



REPUBLIKA E SHQIPËRISË
UNIVERSITETI I SPORTEVE TË TIRANËS
FAKULTETI I VEPRIMTARISË FIZIKE DHE REKREACIONIT
DEPARTAMENTI LËVIZJA DHE SHËNDETI

RREGULLORE E BRENDSHME E DEPARTAMENTIT LËVIZJA DHE SHËNDETI



Kreu I

PARIME TË PERGJITHSHME

Neni 1

Baza ligjore e Rregullores

Rregullorja e Departamentit Lëvizja dhe Shëndeti është mbështetur në Ligjin Nr.80/2015, datë 22.07.2015 "Për arsimin e lartë dhe kërkimin shkencor në institucionet e Arsimit të Lartë në Republikën e Shqipërisë", në zbatim të nenit 33, pika 3, në udhëzimet e Ministrisë së Arsimit, Sportit dhe Rinisë, në Statutin dhe Rregulloren e përgjithshme të UST-së dhe Rregulloren e Fakultetit të Veprimtarisë Fizike dhe Rekreacionit.

Neni 2

Objekti i Rregullores

Objekti i kësaj rregulloreje është përcaktimi i rregullave standard për programet e studimeve universitare të Departamentit Lëvizja dhe Shëndeti. Kjo rregullore specifikon dhe përmirëson praktikën e punës së departamentit. Që kjo rregullore të konsiderohet e plotësuar, nevojitet të shikohet e ndërlidhur me rregulloret e programeve të studimit të hartuara në nivel fakulteti.

Neni 3

Qëllimi i rregullores

1. Kjo rregullore përcakton organizimin, veprimtarinë, detyrat në fushën e mësimdhënies, punës kërkimore shkencore, si dhe marrëdhëniet e Departamentit të Lëvizjes dhe Shëndetit me të gjitha njësitë dhe nivelet e tjera të UST-së.
2. Rregullorja përcakton rregullat për mësimin dhe vlerësimin e studentëve, hartimin dhe përmirësimin e programeve mësimore.

Neni 4

Synimet e Rregullores

Rregullorja e brendshme e departamentit synon:

1. Krijimin e një kuadri koherent dhe të plotë mbi studimet universitare;
2. Përcaktimin e standardeve në lidhje me përgatitjen, organizimin dhe administrimin e studimeve universitare.
3. Krijimin e hapësirave të nevojshme për një menaxhim fleksibël të departamentit, të stafit akademik dhe personelit ndihmës.



Kreu II

ORGANIZIMI DHE DREJTIMI NË DEPARTAMENT

Neni 5

Departamenti si njësi bazë akademike

Referuar Ligjit, Nr. 80/2015, datë 22.07.2015 "Për Arsimin e Lartë dhe Kërkimin Shkencor në Institucionet e Arsimit të Lartë në Republikën e Shqipërisë, Departamenti Lëvizja dhe Shëndeti është njësi bazë.

1. Autoriteti drejtues i departamentit:

Përgjegjësi i Departamentit

2. Organe të tjera plotësuese e ndihmëse:

- Grupi i vlerësimit të cilësisë së brendshme.
- Grupi për organizimin dhe menaxhimin e veprimtarisë kërkimore shkencore të departamentit.
- Grupi për veprimtarinë kurrikulare të departamentit.
- Komisioni i ekuivalentimit të moduleve dhe programeve të studimit në departament.
- Koordinatorët e programeve të studimit të departamentit.

3. Struktura ndihmës-akademike në nivel njësie bazë:

Specialist/Laborant

Neni 6

Programet e studimit në Departament

Programi i studimeve Master i Shkencave në "Aktiviteti Fizik dhe Shëndeti" është hapur me Urdhër Licencimi: UMAS Nr. 48 datë 05.02.2015, të Ministrit përgjegjës për Arsimin e Lartë në Republikën e Shqipërisë. Ky program zhvillohet nën përgjegjësinë e Departamentit të Lëvizjes dhe Shëndetit në bashkëpunim me Departamentet e tjera të Universitetit.

Departamenti Lëvizja dhe Shëndeti bashkëpunon dhe bashkërendon punën mësimore-kërkimore me departamentet e tjera në funksion të realizimit të programit të studimit për të gjitha ciklet e studimit që ofrohen në Fakultetin e Veprimtarisë Fizike dhe Rekrecionit dhe në fakultet e tjera të Universitetit të Sporteve të Tiranës.

Neni 7

Misioni

1. Misioni jonë është pjesë e misionit të UST-së, dhe ndahet në tre komponente specifike për Departamentin.



Rregullore e brendshme e Departamentit Lëvizja dhe Shëndeti

- a. Mësimi: Ofrojmë metoda bashkëkohore mësimdhënie.
- b. Kërkimi: Synojmë që nëpërmjet kërkimit bazë të përmirësojmë dhe të ofrojmë mundësi të reja për zhvillim në fushën e sportit, shëndetit dhe rekreacionit.
- c. Liri Akademike: T'i sigurojmë stafit akademik çdo mundësi drejt kërkimit shkencor të pavarur dhe liri akademike në procesin e mësimdhënies sipas dispozitave të statutit të UST-së dhe legjislacionit në fuqi.

Neni 8

Objektivat strategjike

1. Të përgatisë specialistë të aftë për të përballuar sfidat në fushën e sportit, edukimit fizik, shëndetit dhe rekreacionit.
2. Të zhvillojë bashkëpunimin me institucione rajonale, kombëtare dhe ndërkombëtare të mësimit e kërkimit, për të nxitur impaktin pozitiv të Departamentit në të ardhmen e Fakultetit, Universitetit, vendit dhe rajonit.

Neni 9

Veprimtaria

Veprimtaria e Departamentit përmbledhet si vijon:

- a. Nxit, programon, bashkërendon, zhvillon, organizon dhe administron veprimtarinë e mësimdhënies dhe atë kërkimore-shkencore.
- b. Ofron programe studimi në ciklin e dytë të studimit Master i Shkencave.
- c. Propozon përmiresimin, rinovimin e programeve mësimore në përputhje me kërkesat e kohës. Departamenti propozon gjithashtu hapjen e programeve të reja mësimore.
- d. Harton dhe përgatit kurrikulat e studimeve për të gjitha programet dhe ciklet e studimit. Përgatit planet mësimore për çdo vit akademik, për të gjitha programet e studimit;
- e. Harton dhe kujdeset për rinovimin e vazhdueshëm të programeve të lëndëve dhe moduleve.
- f. Bashkërendon punën me njësitë e tjera të Fakultetit të Veprimtarisë Fizike dhe Rekreacionit dhe UST-së, për realizimin e planit mësimor, për zhvillimin korrekt të lëndëve dhe moduleve që Departamenti mbulon në njësitë e tjera, si dhe për zhvillimin nga ana e Departamenteve të tjera të moduleve të parashikuara në planin mësimor të programeve mësimore që Departamenti Lëvizja dhe Shëndeti ofron.
- g. Kujdeset për arkivimin e të gjithë informacionit që ka të bëjë me jetën akademike dhe kërkimore. Departamenti arkivon planet mësimore vjetore, programet mësimore, CV e përditësuar në mënyrë vjetore të stafit akademik, listen e publikimeve dhe të pjesëmarrjes në konferenca shkencore të stafit akademik, të sesioneve shkencore të organizuara nga vetë Departamenti, etj.



Rregullore e brendshme e Departamentit Lëvizja dhe Shëndeti

- h. Propozon programet e studimit dhe numrin e studentëve për çdo program studimi, në përputhje me kapacitetet akademike dhe infrastrukture, sipas standardeve të cilësisë.
- i. Propozon kriteret e pranimit të studentëve për secilin program studimi, në përputhje me përcaktimet ligjore dhe të akteve nënligjore në fuqi.
- j. Përzgjedh studentët fitues që aplikojnë për studime në programin e ciklit të dytë të studimeve Master i Shkencave. Miratimi i listës përfundimtare bëhet nga Dekani, sipas procedurave të përcaktuara në statutin dhe rregulloret e UST-së.
- k. Përcakton fushat prioritare të kërkimit shkencor sipas strategjisë së kërkimit të miratuar nga Instituti i Kërkimit Shkencor të UST-së në bashkëpunim me Dekanatin përkatës. Mbi bazën e prioriteteve të kërkimit aplikon për fonde, në programe të ndryshme kërkimi kombëtare dhe ndërkombëtare.
- l. Përcakton në fillim të vitit përmbyllës të programeve të studimit të ciklit të dytë Master i Shkencave fushat dhe temat e studimit, emrat e studentëve, pragun e notës mesatare të studentëve fitues, parametrat e mikrotezës, si dhe udhëheq realizimin e tezave të tyre.
- m. Vlerëson dhe raporton në mënyrë vjetore mbi punën mësimore dhe kërkimore, duke evidentuar arritjet, përparësitë, kufizimet, vështirësitë dhe objektivat për të ardhmen.
- n. Ofron shërbime për të tretë, sipas legjislacionit në fuqi dhe rregullave të përcaktuara në statutin dhe aktet e tjera të UST-së.

KREU III

ORGANIZIMI, STRUKTURA DHE DREJTIMI I DEPARTAMENTIT

Neni 10

Organizimi i Departamentit

1. Departamenti ka në përbërje të tij të paktën shtatë anëtarë, të punësuar me kohë të plotë, si personel akademik ku të paktën tre nga ata duhet të kenë minimalisht gradën shkencore "Doktor i Shkencave".
2. Departamenti ka në përbërje personelin ndihmës akademik.

Neni 11

Drejtuesi i Departamentit

1. Drejtuesi i departamentit është autoriteti drejtues akademik dhe përfaqësues i saj. Ai zgjidhet nga asambleja e personelit akademik të njësisë bazë dhe është personel akademik i kategorisë "Profesor" ose ka gradën shkencore "Doktor" (PhD), të fituar pranë universiteteve të vendeve anëtare të OECD-së ose BE-së. Në rastet kur nuk ka kandidatë të kësaj kategorie, mund të kandidojë për drejtues edhe lektori, kur ky i fundit mban gradën shkencore "Doktor".



Rregullore e brendshme e Departamentit Lëvizja dhe Shëndeti

2. Ai mund të shërbejë në detyrë për një mandat katërvjeçar, me të drejtë rizgjedhjeje vetëm një herë.
3. Drejtuesi i Departamentit kryen këto funksione:
 - a. Drejton punën për hartimin e kurrikulave për të gjitha ciklet e studimeve, të lëndëve që mbulon njësia bazë (departamenti), planeve mësimore dhe ndjek zbatimin e tyre.
 - b. Mbikqyr veprimtaritë shkencore në departament, në përputhje me planifikimin vjetor të ngarkesës së punës të stafit akademik sipas aktmarrëveshjes vjetore individuale, mban dokumentacionin e veprimtarisë mësimore-shkencore të personelit akademik të departamentit, harton raportin e analizës vjetore të njësisë, i cili miratohet në mbledhjen e hapur të departamentit, ku ftohen të marrin pjesë edhe autoritetet drejtuese të Fakultetit të Veprimtarisë Fizike dhe Rekreacionit dhe të Rektoratit.
 - c. Mbikqyr respektimin e programeve të mësimdhënies në lidhje me kohën, mënyrën, veprimtaritë e tjera të procesit mësimor, sipas përcaktimeve në planin mësimor dhe kalendarit akademik të miratuar.
 - d. Në mbledhje të departamentit diskuton dhe dakortëson ndarjen e ngarkesës mësimore për stafin akademik me kohë të plotë, sipas kualifikimeve specifike të gjithësecilit. Ndarja e ngarkesës bëhet në përputhje me normat ligjore të përcaktuara në aktet e nxjerra nga Ministria Përgjegjëse për Arsimin e Lartë në Republikën e Shqipërisë, Statuti, Rregullorja e Përgjithshme dhe Rregullorja e Fakultetit të Veprimtarisë Fizike dhe Rekreacionit. Në ndarjen e ngarkesës mbahet parasysh që stafi akademik me kohë të plotë të mbulojë sipas kualifikimit dhe ekspertizës në fushë orët mbi normën mësimore prej 200 orë mësimore vjetore si dhe në rastet kur është e nevojshme edhe 100 orë mësimore shtesë me vendim të Dekanit e propozim të përgjegjësit të departamentit. Në ndarjen e lëndëve dhe moduleve mbahet parasysh që stafi të mbulojë sipas ekspertizës në vazhdimësi të njëjtat lëndë e module duke krijuar kështu kushtet për një ekspertizë me të specializuar në to. Ngarkesa maksimale e lejuar për të gjithë kategoritë e të punësuarve në Departamentin Lëvizja dhe Shëndeti nuk mund të tejkalojë orët totale në auditor, sipas përcaktimeve në tabelën më poshtë:

Kategoria Akademike	Norma mësimore vjetore në auditor	Orë mbi normën vjetore në auditor të lejuara	Orë mbi normën vjetore dhe orët mbi normë të lejuara sipas vendimit përkatës të autoriteteve	Orë totale vjetore në auditor
Rektor	50	200	100	350
Zv/Rektor	60	200	100	360
Dekan	70	200	100	370
Drejtor i Institutit	21	100	N/A	121



Rregullore e brendshme e Departamentit Lëvizja dhe Shëndeti

Zv/Dekan	90	200	100	390
Zv/Drejtor i Institutit	27	100	N/A	127
Përgjegjës i Departamentit	90	200	100	390
Përgjegjës i Departamentit ne Institut	27	100	N/A	127
Prof.Dr	140	200	100	440
Prof.Dr në Institut	42	100	N/A	142
Prof.asoc.Dr	140	200	100	440
Prof.asoc.Dr në Institut	42	100	N/A	142
Lektor (Dr/PhD)	165	200	100	465
Lektor(Dr/PhD) në Institut	49.5	100	N/A	149.5
Asistent Lektor	195	200	100	495
Asistent Lektor në Institut	58.5	100	N/A	149.5
Personel akademik me kohe të pjesshme ose i ftuar	120	N/A	N/A	120

- e. Përgjegjësi i departamentit pas plotësimit me ngarkesë të plotë dhe orët e lejuara shtesë për çdo pedagog, i paraqet për miratim Dekanit ngarkesën e planifikuar të departamentit, duke i bërë me dije edhe orët për lëndë e module të cilat nuk ka qënë e mundur të mbuloen nga stafi akademik me kohë të plotë.
- f. Me miratimin dhe në koordinim me Rektoratin, Përgjegjësi i Departamentit duhet të mbulojë me orë mësimore, në kuadër të ngarkesës mbi normën mësimore të lejuar sipas tabelës së mësipërme, të gjithë ngarkesën e pa plotësuar në departamente apo njësi të tjera kryesore të UST-së, kjo ngarkesë shpërndahet duke patur parasysh ekspertizën dhe specialitetet e fushës të stafit akademik që do ta mbulojë.
- g. Përgjegjësi i departamentit nuk mund të kërkojë shpalljen e një vendi të lirë pune për staf akademik, në të gjitha kategoritë e të punësuarve (me kohë të plotë, të pjeseshme apo të ftuar), pa patur të evidentuar sasinë e ngarkesës mësimore të mbetur e pa mbuluar për shkaqe të ligjshme nga stafi akademik i punësuar me kohë të plotë në UST.



Rregullore e brendshme e Departamentit Lëvizja dhe Shëndeti

- h. I propozon dekanatit kriteret e posaçme të punësimit të personelit akademik në department për të gjitha kategoritë e të punësuarve (me kohë të plotë, të pjesshme apo të ftuar), pas miratimit të tyre në mbledhjen e departmentit.
 - i. Mbikqyr planifikimin dhe realizimin e ngarkesës mësimore të personelit akademik përkatës.
 - j. Organizon analiza periodike për raste e aspekte të veçanta në departament dhe analizën vjetore të punës mësimore shkencore të tij.
 - k. Në emër të departamentit bën përpjekje të vazhdueshme për krijimin e lidhjeve me institucione homologe për realizimin e praktikave mësimore të studentëve të të gjitha cikleve të studimit si dhe për promovimin e departamentit.
 - l. Bën të njohur arritjet e departamentit nëpërmjet nxitjes së botimeve didaktike-shkencore, përfshirjes ose bashkëpunimit në projekte dhe përditësimit të rubrikave në faqen web-it të UST-së.
 - m. I propozon Dekanit, përbërjen e komisionit të provimit të formimit të dakortësuar në mbledhjen e departamentit.
 - n. Në mbledhjen e departamentit krijon komisionet e provimit, të cilat pas miratimit nga ana e Dekanatit i shpall para provimit të lëndës.
 - o. Kryen çdo funksion tjetër të parashikuar në Statutin dhe Rregulloret e UST-së,
4. Mandati i përgjegjës të zgjedhur, të njësisë bazë, mbaron para kohe në rastet:
- a. kur dënohet me vendim gjyqësor të formës së prerë për kryerjen e një vepre penale,
 - b. kur jep dorëheqjen,
 - c. e pamundësisë për të kryer detyrën,
 - d. e shkeljeve të rënda të ligjit,
 - e. kur bëhet i paaftë nga ana fizike apo mendore për të ushtruar funksionin,
 - f. kur largohet nga universiteti,
 - g. kur përfiton lejen sabatike.
5. Referuar Ligjit Nr.80/2015, datë 22.07.2015, "Për Arsimin e Lartë dhe Kërkimin Shkencor në Institucionet e Arsimit të Lartë në Republikën e Shqipërisë", Dekani i propozon Rektorit shkarkimin e përgjegjës të njësisë bazë në rastet e kryerjes së veprave penale flagrante ose të shkeljeve të rënda të ligjit, të pamundësisë për të kryer detyrën dhe për rastet e parashikuara në Kodin e Etikës së UST-së. Rektori shprehet brenda një muaji. Zëvendësuesi i përgjegjës të njësisë bazë caktohet nga Rektori, me propozimin e Dekanit të Fakultetit të Veprimtarisë Fizike dhe Rekreacionit, Rektori shpall zgjedhje të parakohshme Brenda gjashtë muajve nga data e shkarkimit.

Neni 12

Koordinatori i programeve të studimit



Rregullore e brendshme e Departamentit Lëvizja dhe Shëndeti

1. Detyrat dhe përgjegjësitë e koordinatorit të programeve të studimit rrjedhin nga Kodi i Cilësisë.
2. Është anëtar efektiv i departamentit.
3. Propozohet nga drejtuesi i njësisë bazë dhe miratohet dhe shkarkohet nga drejtuesi i njësisë kryesore.
4. Është përgjegjës për ecurinë dhe zhvillimin e programit dhe praktikave mësimore, në përputhje me objektivat e tyre.
5. Detyrat e koordinatorit të programit të studimit janë:
 - a. Të paktën gjashtë muaj përpara fillimit të vitit akademik, në bashkëpunim me përgjegjës të njësisë bazë përgatit dokumentacionin për ndryshimet e propozuara në planin mësimor.
 - b. Informon vazhdimisht titullarin e njësisë përkatëse për ecurinë e zbatimit të programit të zbatimit.
 - c. Ndjek zhvillimin e praktikave mësimore dhe është përgjegjës për arritjen rezultateve të nxënies të përcaktuara në syllabusin përkatës.
 - d. Harton raporte të ecurisë së zbatimit të marrëveshjeve të bashkëpunimit kryesisht në kuadër të zhvillimit të praktikave.
 - e. Komunikon me NJSBC-në lidhur me problemet e ndryshme të programeve të studimit me qëllim përmirësimin e tyre.
 - f. Mbledh të dhëna dhe/ose kryen pyetësorë në fushat e veprimtarive të programit për vlerësimin e efektshmërisë së zhvillimit të praktikave dhe punësimin e studentëve.
 - g. Zhvillon analiza/raporte në njësinë përkatëse lidhur me pyetësorët që zhvillon stafi akademik për vetëvlerësimin e performancës së mësimdhënies.
 - h. Bashkëpunon me njësinë e Karrierës dhe Alumni-t për mundësi praktikash për studentët e programeve të studimit.
 - i. Përgatit në njësinë përkatëse argumentimin për riorganizimin e programeve të studimit.
 - j. Koordinon organizimin e veprimtarive me karakter kërkimor-shkencor, si për shembull seminare dhe simpoziume shkencore, orë të hapura, etj.
 - k. Mban kontakt të vazhdueshëm me studentët e programit/programeve të studimit dhe nxit bashkëpunimin me to.
 - l. Kryeson dhe koordinon procesin e akreditimit të programeve të studimit.

Neni 13

Personeli akademik i brendshëm

1. Personeli akademik i Departamentit kryen veprimtari të mësimdhënies, të kërkimit shkencor, kontribut institucional e profesional si dhe veprimtari të tjera.
2. Personeli akademik në institucionet e Arsimit të Lartë, sipas rolit dhe veprimtarisë që kryen, kategorizohet në:
 - a. Profesorë.



Rregullore e brendshme e Departamentit Lëvizja dhe Shëndeti

- b. Lektorë.
 - c. Asistent-Lektorë.
3. Detyrat e personelit akademik janë si më poshtë:
- a. Harton në kohën e duhur, programin mësimor të lëndës, modulit në përputhje me planin kalendarik, një kopje e të cilit në dy gjuhë shqip/anglisht dorëzohet në departament në formë fizike dhe elektronike.
 - b. Zhvillon me korrektesë programin mësimor.
 - c. Përmbush detyrimet për realizimin e normës mësimore dhe ngarkesën maksimale brenda Departamentit Lëvizja dhe Shëndeti apo njësive të tjera bazë e kryesore në UST.
 - d. Personeli akademik i punësuar me kohë të plotë në Fakultetin e Veprimtarisë Fizike dhe Rekreacionit mund të angazhohet me kohë të pjesshme vetëm në një institucion tjetër të Arsimit të Lartë, me:
 - i. marrëveshje mes dy institucioneve;
 - ii. miratimin e drejtuesit të njësisë bazë dhe kryesore;
 - iii. miratimin e rektorit.
 - e. Harton tezat e provimit. Hartimi i tezave bëhet nga drejtuesi i lëndës/modulit, jo më vonë se tre ditë para provimit dhe miratohet nga përgjegjësi i departamentit. Kur një lëndë/modul realizohet nga dy pedagogë, përgatitja e tezave të provimit kryhet në bashkëpunim me pedagogun tjetër. Numri i pyetjeve në tezë dhe vlerësimi me notë, është në proporcion me ngarkesën e secilit modul në programin lëndor në fjalë.
 - f. Zbaton udhëzimet që vijnë nga autoritetet drejtuese të institucionit gjatë realizimit të programit mësimor, respekton, zbaton dhe vepron në përputhje me ligjislacionin në fuqi.
 - g. Respekton gjatë gjithë veprimtarisë së tij parimet e etikës qytetare, Kodin e Etikës të UST-së.
 - h. Respekton me përgjegjësi orarin dhe disiplinën në punë.
 - i. Plotëson me përgjegjësi regjistrin mësimor.
 - j. Personeli akademik i punësuar me kohë të plotë në Fakultetin e Veprimtarisë Fizike dhe Rekreacionit nuk mund të punësohet si personel akademik me kohë të plotë në një institucion tjetër të Arsimit të Lartë, brenda dhe jashtë vendit.

Neni 14

Personeli akademik me kontratë të përkohshme, me kohë të pjesshme si dhe të ftuar

Për të plotësuar nevojat e veprimtarisë mësimore dhe kërkimore të Departamentit, Përgjegjësi i Departamentit, i drejton Dekanit të Fakultetit kërkesën e argumentuar me shkaqe të përlligjura, për të punësuar personel akademik me kontratë të përkohshme, personel me kohë të pjesshme



Rregullore e brendshme e Departamentit Lëvizja dhe Shëndeti

dhe/ose personel akademik të ftuar. Kriteret e punësimit përcaktohen në statutin dhe rregulloret përkatëse të UST-së për rekrutimin, në përputhje me të gjitha aktet ligjore dhe nënligjore në fuqi.

1. Punësimi i personelit akademik me kohë të plotë, me kohë të pjesshme, me kontratë të përkohshme si dhe të ftuar bëhet bazuar në aktet ligjore e nënligjore që rregullojnë veprimtarinë e Arsimit të Lartë në Republikën e Shqipërisë, si dhe legjislacionin që rregullon marrëdhëniet e punës.
2. Punësimi realizohet me procedurë të konkurimit të hapur publik, në një proces transparent dhe të paanshëm.
3. Kriteret e përgjithshme dhe procedurat e punësimit të personelit akademik në të gjitha kategoritë e të punësuarve si staf akademik janë të përcaktuara në Statutin e UST-së, Rregulloren e përgjithshme, Rregulloren e rekrutimeve dhe në Rregulloren e Fakultetit të Veprimtarisë Fizike dhe Rekreacionit
4. Kriteret specifike të punësimit në të gjitha kategoritë e të punësuarve si staf akademik hartohen nga departamenti dhe miratohen nga drejtuesi i njësisë kryesore, i cili ia përcjell ato zyrtarisht Rektorit të UST-së, së bashku me argumentimin e nevojës së legjitimuar për rekrutimin.

Neni 15

Personeli ndihmës akademik

Personeli ndihmës akademik, ka një pozitë juridike e cila përcaktohet në Rregulloret UST-së si dhe të Fakultetit të Veprimtarisë Fizike dhe Rekreacionit. Detyrat e tij në departament janë:

1. Përgatit bazën material për zhvillimin e orëve të laboratorit sipas programit të lëndës/modulit.
2. Ndihej studentët gjatë zhvillimit të orëve të laboratorit dhe praktikave mësimore.
3. Pas mbarimit të punëve laboratorike, kujdeset për bazën materiale duke i vendosur ato në vendet e caktuara.
4. Bën kërkesë për mjete laboratorike, pajisje didaktike mësimore të sallave dhe terreneve sportive, etj të nevojshme për kryerjen e orëve të procesit mësimor.
5. Përgatit nën drejtimin e pedagogut përgjegjës të laboratorit dhe mirëmban koleksione, aparatura, bazë material laboratorike të arkivuar etj. Merr pjesë në praktikat mësimore me studentët, në përmbushje të programit dhe specifikave të studimit.
6. Merr detyra nga përgjegjësi i departamentit, ndjek realizimin dhe zbatimin e tyre në kohë.
7. Pranon ankesat e studentëve për vlerësimet në provime dhe ia përçon ato përgjegjësit të departamentit.
8. Njofton personelin akademik të departamentit për mbledhje, seminare dhe aktivitete të tjera.
9. Mban procesverbalin e mbledhjeve të departamentit.
10. Shtyp shkrime e material shkresore të departamentit.
11. Në datë 30 të çdo muaji, përgatit dhe dorëzon në dekanat, prezencën në punë të pedagogëve të departamentit në bashkëpunim me përgjegjësin e departamentit.



Neni 16

Regjistri mësimor

1. Regjistri mësimor është i vetmi dokument shtetëror zyrtar bazë për të evidentuar zhvillimin e mësimin dhe pjesëmarrjen e studentëve në procesin mësimor.
2. Regjistri mësimor plotësohet për çdo orë mesimi, ai firmoset nga vetë pedagogu i lëndës/modulit.
3. Regjistri mësimor është objekt kontrolli periodik nga përgjegjësi i departamentit dhe përfaqësues të rektoratit. Me anën e tij verifikohet realizimi i programit dhe ngarkesa mësimore vjetore. Ai duhet të përdoret dhe të ruhet në sekretari.
4. Çdo korrigjim në këtë regjistër duhet të siglohet.
5. Mospjesëmarrja e studentëve në elementet e mësimin me frekuentim të detyrueshëm vlerësohet me mungesë në regjistrin mësimor. Çdo pedagog është i detyruar të shënojë në regjistër emërtimin e lëndës, elementet e mësimin të zhvilluar, si dhe të pasqyrojë saktë mungesat.

KREU IV

ORGANIZIMI, ELEMENTET E STUDIMEVE, VLERËSIMI I DIJEVE TË FITUARA

Neni 17

Organizimi i vitit akademik

Viti akademik organizohet si rregull në dy semestra, me 15 javë secili. Ngarkesa javore në auditor e studentit varion në kufijtë 20-25 orë/javë. Kohëzgjatja e seancave mësimore është 50 minuta dhe një pushim i shkurtër prej 10 minutash. Çdo semestër përfshin minimalisht 30 ECTS.

Neni 18

Struktura e studimeve

1. Programet e Ciklit të dytë të studimeve.
2. Programet e ciklit të dytë të studimeve "Master Shkencor", janë të organizuara në 2 vite akademike dhe përfshijnë jo më pak se 120 ECTS.
 - a. Programi i studimit përfshin lëndë, module të detyruara dhe me zgjedhje;
 - b. Studentet diplomohen pas mbrojtjes së tezës së Diplomës në prani të Komisionit të provimit.
 - c. Në përfundim të programit të ciklit të dytë, lëshohen diplomat përkatëse.



Neni 19

Organizimi dhe vlerësimi i praktikave mësimore

1. Praktika mësimore realizohet në semestrin e përcaktuar në planin mësimor të studimit.
2. Kohëzgjatja dhe afati i kryerjes përcaktohen në strukturën e vitit akademik.
3. Për aktivitete të grupuara jashtë institucionit, në funksion të procesit mësimor të lëndëve apo moduleve specifike sipas programit mësimor, fakulteti merr përsipër të mbulkojë atë masë të shpenzimeve të miratuara nga Bordi i Administrimit dhe studenti plotëson pjesën e mbetur të pambuluar.
4. Departamenti mban përgjegjësi për evidentimin e kompanive ose institucioneve të mundshme për kryerjen e praktikës mësimore, si dhe krijimin e lidhjeve me to. Studenti mund t'i propozojë departamentit vendin ku mund të kryejë praktikën mësimore.
5. Dekani i Fakultetit lidh marrëveshje bashkëpunimi me kompanitë pritëse.
6. Praktikrat mësimore zhvillohen në institucione ose kompani sipas profilit të përgatitjes së studentit dhe nën supervizionin e stafit akademik të caktuar nga departamenti përkatës.
7. Departamenti bën ndarjen e studentëve nëpër kompani ose institucione pritëse, duke respektuar edhe dëshirat e tyre.
8. Studentët kanë detyrimin e kryerjes 100% të orëve të praktikës mësimore. Studenti respektojë rregullat e institucionit pritës. Gjatë kryerjes së praktikës mësimore, punonjësi mësimor që supervizon atë, mban lidhje me personin e ngarkuar në qendrën ku kryhet praktika.
9. Në përfundim të praktikës mësimore, studenti përgatit një relacion për punën e kryer, dorëzon raportin e vlerësimit nga kompania ku ka kryer praktikën në datën e caktuar nga departamenti dhe komisioni i ngritur prej tij, pasi merr në konsideratë vlerësimin e kompanisë (qendrës) ku është kryer praktika dhe relatimin e studentit bën vlerësimin e tij/saj me notë.
10. Vlerësimi i praktikës mësimore në procesverbal bëhet me notë. Nëse studentit nuk paraqitet në datën e caktuar, në procesverbal shënohet "Nuk u paraqit".
11. Nëse studentit në praktikën mësimore vlerësohet me "Nuk u paraqit" ose me notë jokaluese, duhet ta shlyejë atë në datat e provimeve të shpallura para sezonit të diplomimit ose në sezonin e vjeshtës të vitit të dytë.

Neni 20

Kushtet e kalimit në vitin pasardhës dhe të diplomimit

1. Viti akademik mbyllet në përfundim të sezonit të vjeshtës.
2. Studenti i vitit të parë Master Shkencor kalon në vitin e dytë nëse ka grumbulluar minimumi 30 kredite.
3. Studenti i vitit të dytë Master Shkencor ka të drejtë të paraqitet në provimin për mbrojtjen e tezës së diplomës, nëse ka kaluar në të gjitha lëndët e programit mësimor të ciklit të dytë dhe ka grumbulluar të gjitha kreditet nga këto lëndë.



Rregullore e brendshme e Departamentit Lëvizja dhe Shëndeti

4. Studenti i vitit të dytë të ciklit të dytë të studimeve në Master Shkencor, që nuk plotëson kriteret për të hyrë në provimin e mbrojtjes së tezës së diplomës në vitin pasardhës (pika 2 dhe 3 e këtij neni) shpallet përsëritës dhe ka këto të drejta e detyrime:
 - a. I njihen të gjitha detyrimet e shlyera në vitin ose vitet paraardhës, kur programet e moduleve janë në efekt për vitin akademik në vazhdim;
 - b. Të paraqitet në sezonet e rregullta të provimeve dhe sezonin e vjeshtës të vitit që është shpallur përsëritës, për modulet që është vlerësuar me notë negative ose nuk u paraqit;
 - c. Është i detyruar të frekuentojë modulet për të cilat ka si detyrim frekuentimin (në masën e caktuar në rregulloren e UST-së) të vitit që është shpallur përsëritës dhe të paraqitet në sezonet e rregullta të provimeve dhe sezonin e vjeshtës të këtij viti;
 - d. Është i detyruar të frekuentojë modulet e reja për shkak të ndryshimit të kurrikulës së programit të studimit, të vitit që është shpallur përsëritës (jo për vitin e mëparshëm) dhe të paraqitet në sezonet e rregullta të provimeve dhe në sezonin e vjeshtës;
 - e. Duhet të paguajë tarifën e shkollimit.
5. Studenti i vitit të dytë që nuk plotëson kriteret për t'u paraqitur në provimin e tezës së diplomës, (pika 4 e këtij neni) pasi ka detyrime të pashlyera (module të vlerësuara me notë negative ose nuk u paraqit), ka këto të drejta dhe detyrime:
 - a. Të shlyejë detyrimet e prapambetura në sezonin e posaçëm atë të vjeshtës dhe sezonet e rregullta të dimrit të vitit pasardhës pas përmbushjes së të gjitha detyrimeve, ai mund të paraqitet në provimin e mbrojtjes së tezës së diplomës, sipas kalendarit akademik të miratuar;
 - b. Nëse nuk arrin të shlyejë detyrimet në afatet e përcaktuara në pikën 5a të këtij neni mund t'i shlyejë ato në sezonin plotësues pasardhës dhe sezonin e rregullt të po atij viti dhe të paraqitet në provimin e mbrojtjes së tezës së diplomës gjatë sezonit të rregullt të vitit akademik **precedent**.
6. Studenti i vitit të dytë që nuk plotëson kriteret për t'u paraqitur në provimin e tezës së diplomës (pika 4 e këtij neni) pasi ka detyrime të pashlyera (module me note negative ose nuk u paraqit dhe të paktën një modul me detyrim frekuentimin) shpallet përsëritës dhe ka këto të drejta e detyrime:
 - a. I njihen të gjitha detyrimet e shlyera në vitin ose vitet paraardhëse kur programet e moduleve janë efektive edhe në vitin në vazhdim.
 - b. Studenti paraqitet në sezonet e posaçme të provimeve, sezonet e rregullta dhe sezonin e vjeshtës të vitit që është shpallur përsëritës (viti i dytë), për modulet që është vlerësuar me notë negative ose nuk u paraqit;
 - c. Është i detyruar të frekuentojë modulet për të cilat ka detyrim frekuentimin;
 - d. Është i detyruar të frekuentojë modulet e reja të vitit që është shpallur përsëritës (viti i dytë), për shkak të ndryshimit të kurrikulës së programit të studimit (por jo për vitet e mëparshme);
 - e. Duhet të paguajë tarifën e shkollimit.



Neni 21

Hartimi i tezes së provimit

1. Teza e provimit hartohet nga pedagogu titullar i lëndës, modulit, me alternativa ose me zhvillim, para provimit.
2. Kur lënda ka dy ose më shumë module, teza zhvillohet nga titullarët e moduleve dhe përgatitet në bashkëpunim në raport të drejtë me ngarkesën mësimore të secilit modul përbërës të lëndës.
3. Numri i pyetjeve në tezë është në proporcion me ngarkesën mësimore për secilin modul.
4. Në vlerësimin e studentit, nota e pedagogut që zë peshën më të madhe të pyetjeve në tezë është përcaktuese.

Neni 22

Zhvillimi i provimit

1. Ndalohet hyrja në provim e personave të jashtëm, qofshin dhe anëtarë të personelit të universitetit, me përjashtim të drejtuesit të departamentit, Dekanit apo Rektorit të UST-së si dhe personave të tjerë të autorizuar me shkrim nga Dekani/Rektori/Rektorati për të kryer monitorim/kontroll.
2. Studenti nuk lejohet të futet në provim nëse nuk disponon një nga mjetet e mëposhtme të identifikimit:
 - Pasaportë, kartë identiteti, kartën e studentit ose leje të drejtimit të automjetit.
3. Gjatë provimit mund të lejohet përdorimi i mjeteve ndihmëse (makina llogaritëse, etj), por në asnjë rast i celularëve. Studenti që në provim përdor forma e mjete të palejueshme përjashtohet nga provimi.
4. Provimet me shkrim zgjasin jo më pak se 1, por jo shumë se 2 orë. Pas dhënies së tezës në provimin me shkrim, nuk lejohet futja në provim e studentëve të tjerë të grupit, apo kursit përkatës.

Neni 23

Rregulloret e programeve të studimit

1. Programet e studimit, janë të rregulluara me rregullore të veçanta.
2. Në këto rregullore përcaktohen specifikat e programit, lëndëve dhe moduleve.

Neni 24

Viti sabatik i personelit akademik të brendshëm përcaktohet me rregullore të veçantë të miratuar nga senati akademik i UST-së.

Neni 25



Rregullore e brendshme e Departamentit Lëvizja dhe Shëndeti

Çdo ndryshim në këtë rregullore bëhet me propozim të Departamentit të Lëvizjes dhe Shëndetit, me miratim të Dekanatit të Fakultetit të Veprimtarisë Fizike dhe Rekreacionit dhe Vendim të Senatit Akademik të UST-së.

Neni 26

Kjo rregullore e shtrin veprimtarinë e saj duke filluar nga viti akademik 2020-2021.